

**Uunga siunnersuut: Imigassaq pillugu Inatsisartut inatsisaata allanngortinneqarnissaa
pillugu Inatsisartut Inatsisaat**

Peqqissutsimut Naalakkersuisumit saqqummiunneqartoq

pillugu

**Inuussutissarsiornermut Aatsitassanullu Ataatsimiititaliap siunnersuutip
aappassaaneerneqarneranut**

ISUMALIUTISSIISUTAA

Ataatsimiititaliap suliarinninnermini inuttarai:

Inatsisartunut ilaasortaq Mariane Paviasen, Inuit Ataqatigiit, Siulittaasoq
Inatsisartunut ilaasortaq Aqqalu Jerimiassen, Atassut, Siulittaasup tullia
Inatsisartunut ilaasortaq Knud Mathiassen, Inuit Ataqatigiit
Inatsisartunut ilaasortaq Lars Poulsen, Siumut
Inatsisartunut ilaasortaq Hans Aronsen, Inuit Ataqatigiit
Inatsisartunut ilaasortaq Aslak W. Jensen, Siumut
Inatsisartunut ilaasortaq Pele Broberg, Naleraq

UPA2022-mi marsip ulluisa 22-anni siullermeerinninnerup kingorna siunnersuut
ataatsimiititaliamit misissorneqarpoq.

Siunnersuutip imarisai siunertaalu

Ullumikkut aalakoornartortalinnik imigassanik 4,10-mik kimittussusilinnik
saassaalliisinnaanermut akuersissuteqartut, 5,09-mik kimittussusilinnik
sassaalliisinnaalernissaat Naalakkersuisunit siunnersuutikkut kissaatigineqarpoq.

Aammattaaq nappaatinik tuniluutiasunik siaruaattoqarneranut atatillugu Naalakkersuisut
tuniniaanermik aamma sassaalliinermik killilersuigallarnissamut
inerteqquteqarallarnissamulluunniit siunnersuutikkut piginnaatinneqarput.

Tamatuma saniatigut ulluni aqaguani freerfiussani ammasarfinnik sivitsuineq pillugu
maleruagassat kiisalu inatsisip pineqaatissiinermut aalajangersagai erseqqissarneqarput.

Inatsisartuni siunnersuummik siullermeerinninneq

Siunnersuut siullermeerinninnermi amerlasuunit taparserneqarpoq. Demokraatilli siunnersuutip ilaa, Naalakkersuisut nappaatinik tuniluutiasunik siaruaattoqarneranut atatillugu tuniniaanermik aamma sassaalliinermik killilersuigallarsinnaanissaannik inerteqquteqarallarsinnaanissaannilluunniit periarfissiisoq tapersinngilaat.

Tusarniaaneq

Siunnersuut piffissami oktobarip ulluisa aqqaneq aappaanniit 2021 novembarip ulluisa qulingiluaannut 2021 tusarniaatigineqarsimasoq Naalakkersuisut ilisimatitsipput. Tusarniaanermut tunngatillugu ataatsimiititaliaq allanik oqaaseqaatissaqanngilaq.

Ataatsimiititaliap siunnersuummik suliarinninnera

Inatsisartuni siunnersuutip taparserneqarluarnera ataatsimiititaliap maluginiarpa. Siunnersuutip pingaarnertut immikkoortui, nioqquteqarnerup ineriartornerata aamma covid-19-imik nappaalanermi misilittagaqalernerup pissusissamisoortumik kingunerisut ataatsimiititaliamit isigineqarput.

Inuiaqatigiit inuiaqatigiinnulluunniit pingaarutillit nappaammut nalinginnaasumik navianartumut illersorneqarnissaat pisariaqarpat Naalakkersuisut aalajangersakkamik aatsaat atuinissaat tunngavissaatinneqartoq ataatsimiititaliamit oqaatigineqassaaq. Aamma tunngavissaatinneqarpoq, killilersuinerit inerteqqutilluunniit taamaaliornermi siunertap angunissaanut pisariaqartut sinnerlugit ingerlatiinnarneqassanngimmata.

Siunnersuummi nr. 1-imut aamma 2-mut, imigassap aalakoornartortallip akuerisaasup 4,10-mit 5,09-mut allanngortinneqarneranut, tunngatillugu nassuiaatini allassimavoq, imigassanik aalakoornartortalinnik 4,10 tikillugit kimittussusilinnik niuernissamut akuersissummik piginnittut immiaaqqanik il.il. assigiinngitsunik amerlanerusunik pisisartunut 5,09 tikillugit kimittussusilinnik nioqquteqarnissaminnut qinnuteqarsinnaalissasut.

Tamanna ima paasineqarsinnaavoq: imigassat aalakoornartortallit kimittussusiannik siunnersuummi qaffaaneq atorsinnaajumallugu akuersissuteqareersut qinnuteqaqqittariaqassasut. Taamaattoqartariaqarnera ataatsimiititaliap ilimaginngilaa, aammalu akuersissuteqareersut inatsisip atuutilernerani qinnuteqaqqeqqaaratik 5,09 procent tikillugu kimittussusilinnik imigassanik sassaalliisnaanissaat ilimagalugu. Taamatut paasinninneq aappasaaneerinninnissamut akissuteqaamminni uppersaqqullugu Naalakkersuisut qinnuigineqarput

Siunnersuutigineqartumut § 41 a-mut tunngatillugu, ataatsimiititaliap maluginiarpaa, imigassanut aalakoornartortalinnut killilersuinermut imaluunniit tuniniaanermut sassaalliinermullu Naalackersuisut aalajangersakkanik atuukkallartussanik piginnaatinneqarnerat pineqartoq. Kommuniit imaluunniit nunaqarfimmi aqutsisut kaammattuuteqareernerisa kingorna siunissami malittarisassat aalajangersaavigineqartarnissaannut tamanna allannguuteqartitsinaviangilaq, tak. § 41 atuutiinnassaaq.

Naalackersuisunut piginnaatitsissut siunnersuutigineqartoq nappaalasoqarneranut atatillugu taamaallaat atorneqarsinnaasunngortinneqartoq ataatsimiititaliap maluginiarpaa, aalajangersagarli atuuttoq kommunit imaluunniit nunaqarfinni aqutsisut qinnuteqarnerannik suli tunngaveqartussaasoq, taanna siammassinnerusumik atorneqarsinnaasoq, tassa meeqqat pitsaasumik atugaqarnissaannut imaluunniit innuttaasut isumannaatsuunissaannut il.il. imigassat aalakoornartortalit ulorianartorsiortitsinerini.

Siunnersuutip aningaasaqarnikkut kingunissai

Inuiaqatigiinni inuiaqatigiinnulluunniit pingaarutilinni nalinginnaasumik navianartumik nappaalasoqarneranut atatillugu imigassamik tuniniaanerup matugallarneqarsinnaanera eqqaassanngikkaanni siunnersuut annertuumik kinguneqartussatut naatsorsuutigineqanngitsoq Naalackersuisut oqaatigaat.

Ataatsimiititaliap inassuteqaatai

Ataatsimiititaliap isumaqatigiittup siunnersuut **akuersissutigineqassasoq** inassutigaa.

Ataatsimiititaliap taama oqaaseqaateqarluni isumaliutissiissummilu allassimasutut paasinnilluni siunnersuut aappassaaniigassanngortippaa.

Mariane Paviasen
Siulittaasoq

Aqqalu Jerimiassen
Siulittaasup tullia

Knud Mathiassen

Hans Aronsen

Lars Poulsen

Aslak W. Jensen

Pele Broberg